

IRANIERE

Iraniere intiegiri itsipaegi

1 ¹Antari ishiriagakotakara Joasume mavati ipegakara igoveenkariegite iyashikiiganakerira Jora, yogari koveenkari Navokoronosore iponiaka Vavironiaku ipokake Jerosarenku itentaigakarira isoraroegite yonkuatakoigakarora yomanataigakarira timaigatsirira anta. ²Impogini yaganakeri Joasume yamanakerira Vavironiaku, intitari pimantakeri Tasorintsi iragana-kenkanira. Ario ikañotagakero aikiro nagetatsirira ivankoku Tasorintsi yagagarantagetanakerora yamagetanakerora Vavironiaku yogapaakerora ivankoku itasorintsite ontaikantagani-rira magatiro ipunkanirira irirori.

³Impogini yogari koveenkari Navokoronosore ikaemakeri Asepenase itinkamiegi ironampiriaegi ikantakerira inkogakenerira iseraereegi. ⁴Inti ikogake iragaigakenerira iitaneegi pegaigavetankicharira igoveenkariegite intiegiri aikiro irashiegi itinkamipage. ⁴Inti ikogake ikyaenkarira gaenokaiganankicha kametitasanoigankitsirira terira tyara inkantumaigempa, gaveaigankitsinerira irogoigakera shintsi ontiri aikiro govageigakerorira posantepage. Aikiro iragaveaigakera irantavagetimoigakerira koveenkari ivankoku. Aikiro ikantakeri iragaigakerika oketyo irogotagaigakeri

irashiegi irinianeegi isankevantakagai-gakerira irogoigakerora magatiro yogoigirira iriroegi karereoegi. ⁵Impo ikantiri: “Omirinka kutagiteri nompakagantaigakeri noseka nogarira naro ontiri aikiro vino noviikarira, impo aganakempara mavati shiriagarini ario pamaigakenari noneaigakerira.”

⁶Irirori iatake ikogakenerira impo yagakeneri tovaini. Ario itentagaigakari paitacharira Iraniere intiri Ananiashi intiri Misaere intiri aikiro Asariashi. Imirinkaegi inti iyashikiiganakerira Jora. ⁷Kantankicha yogari Asepenase ontiri ipaitairi Iraniere Veretsasare. Yogari Ananiashi ontiri ipaitairi Sarerako. Yogari Misaere ontiri ipaitairi Mesako, impo yogari Asariashi ontiri ipaitairi Averenego. ⁸Yogari Iraniere ikogake intsatagakerora ikantagetirira Tasorintsi tera inkoge irogakemparora ikantavitan-takerira nerotyo ikantantakaririra Asepenase ikantiri:

—Atsi gara pogakaganari ivatsatsite koveenkari ontiri aikiro ivinone gara poviikakaganaro.

⁹Irirori ishineventakari Iraniere itasanotakaritoyo kara, ariotari ikogakeri Tasorintsi onkañotakempara maika, kantankicha ikemakerira ikantakera maika itsaroganake ¹⁰ikantiri:

—Kantankicha intityo nopinkake nogoveenkarite, irirotari kantankitsi

a 1.3 Iseraereegi: yogaegiri iseraereegi oniakotakerira aka intitari iyashikiiganakerira Jora yamaiganunkanirira Vavironiaku. 2 Kov. 24.8-15.

nompagakempira piseka ontiri pimire iramakagantaigakempirira. Antari garika nopaigimpi ivatsatsite impo ineaigavetempi pairaigamatakevi kiteigamatakevi tera pinkañoigempari pitovaireegi nantityo pogakagantaigake.

¹¹Impo yogari Iraniere ovashi irirokya iniake Meresare. Yogari Meresare irirotari ikantakerira Asepenase ineaigakerira Iraniere, Ananiashi, Misaere intiri Asariashi. Impo ikantiri:

¹²—Maika nokogavetaka pineaigave-takenara naroege gara pipaigana ivatsatsite koveenkari ontiri ivinone. Intagati pimpaigakena pankirintsipage ontiri nia nomagakoigake 10 kutagiteri ¹³impō pineaigakena ariorika nonkañoigakempari notovaireegi gaigankicharira ivatsa ontirika gara. Antari garika nokañoigari ontirika nonkiteiganake virompatyo tyarika pinkantaigakena.

¹⁴Impo irirori ikematsakeri ovashi tera impaigeri ivatsa ontiri vino kigonkero aganaka 10 kutagiteri.

¹⁵Impogini ikamosoigaatiri ineaigavetari pairotyō yavisaigake iriroegi ikakiaigakera, yavisaigakerityo itovaireegi gaigankicharira ivatsatsite koveenkari, ¹⁶ovashi tera impumaigeri ivatsa ontiri vino, intagati ipaigiri pankirintsipage ontiri nia.

¹⁷Impo yogari Tasorintsi pairotyō ikavintsaavageigakeri iriroegi yagaveakagakeri irogovageigakera sankevantipage ontiri aikiro posantepage pashini kametiripage. Yogari Iraniere onti yagaveakagakeri irogotakerora kisanirintsipage.

¹⁸Impogini avisanakara mavati shiriagarini, yogari Asepenase itentaiganakari maganiro yogotagaigakerira yamaiganakeri inakera Navokoronosore iokotagaigakerira. ¹⁹Impo antari iniaigakerira irirori ineakeri Iraniere, Ananiashi, Misaere intiri Asariashi pairotyō

yavisaigakeri itovaire ovashi ikantaigakeri inkantakanira irinaigake iriroku irantimoigakerira. ²⁰Impogini tatarika ikogakotagantageigiri ineaigakeri pairotyō yavisavageigakeri maganiro seripigariegi intiegiri govageigatsirira timageigatsirira kara igipatsiteku.

Igisaniye Navokoronosore

Impogini yogari koveenkari Navokoronosore ikisanivagetake. Impo ikaemai-gakeri govageigatsirira inkamantaigakerira tatoita gimanatakeri, kantankicha teratyō tyani gaveatsine irogotakerora igisanire. Panirottyō ikantakara Iraniere yogotakerora, irirotari gotagakeri Tasorintsi, nerotyō ikamantantakaririra koveenkari Navokoronosore tatoita gimanatakeri.

2 ⁴⁶Antari ineakera ikamantakerira ogatyō ikenake itigeroaventanakari yogivosetanakatyo savi, aikiro ikantake impakenkanira kañorira ipaganirira ipegagetaganirira tasorintsi ontiri aikiro intagakenkanira kasankapaneri. ⁴⁷Impo ikantiri:

—Yogari Tasorintsi pikematsaigirira viroegi pairotyō yavisavageigakeri pashinipage tasorintsi, aikiro paio yavisavageigakeri maganiro koveenkari-page, irirotari gotagantiro terira ogotumatenkani nerotyō yogotagantakempirorira maika pogotakerora nogisanire.

⁴⁸Impogini ovashi ipagetakeri Iraniere posantepage kametiripage, aikiro ipegakagakari inampina neagetakeneririra magatiro Vavironiaku ontiri aikiro ipegakagakari itinkamiegi maganiro govageigatsirira timaigatsirira Vavironiaku. ⁴⁹Impo yogari Iraniere ikantakeri Navokoronosore ikogakera irimutakoigakerira Sarerako, Mesako intiri aikiro Averenegro irironiri aiganki-

tsine ineageigakerira timaigatsirira Vavironiaku. Irirori onti yantavageti ivankoku Navokoronosore.

Iokavokiigavetunkanira Sarerako, Mesako intiri Averenego oronoku

3 ¹Impogini yogari koveenkari Navokoronosore yovetsikakagantake ikañotagakarira matsigenka yogaratinkakotagantakeri pampaku paitacharira Irora kara Vavironiaku. Inti yovetsikantunkani kori imaranerikatyo kara ariotsantsaarikatyo kara inake 30 metero, antari ivatsaku onti inake 3 metero. ²Impo ikantake Navokoronosore irapatoitaigakempara maganiro itinkamipage timaigatsirira igipatsiteku. Inti patoitaigankichane maganiro neageigakeneririra magatiro igipatsiteku, itinkamiegi isoraroegite, maganiro inampinaegi, tesoreroegi, joeseegi, inampinaegi tinkamiigatsirira, intiegi maganiro neginteigakerineririra timageigatsirira igipatsiteku. Ikantake irapatoventaigakempara yoga yovetsikakagantakerira ineagakerira irompatakaventaigakempara.

³Impo yapatoitaigaka maganiro iriroegi yaratinkaigake inakera yovetsikakagantakerira Navokoronosore.

⁴Impo yogari inampina inianake imaraenkarikatyo kara ikanti: “Maika atsi pinkemisantaigakenara maganiro viroegi poniageigankicharira parikotipageku niantaigarorira pashinipage niagantsi. ⁵Ikantaketari koveenkari pinkemaigavakerora ontivotanakenkanira tivorintsi, aikiro osonkatanakenkanira sonkarintsi, ontiri aikiro ontamporatanakenkanira tampora, oniakaganakenkanira arepa irorori ompoimaenkanakera magatiro, maganirosanotyo viroegi pompatakaventaiganakempara

yoka yovetsikakagantakerira. ⁶Tyanirika garira yompatakaventari intagakenkanyo oronoku.”

⁷Impo iriroegi ikemaigavakerora otsigempitaretanakera ogatyo ikenaigake yompatakaventaiganakari.

⁸Kantankicha yogaegi itinkamiegi karereoegi iaigake ⁹itsavetantaigakerira jorioegi^b ikamantaigakerira Navokoronosore ikantaigiri:

—iNogoveenkari egite, nokogaigake pinkusogamanetakera! ¹⁰Virori pikantake irapatoitaigakempara maganiro irapatoventaigakempara povetsikakagantakerira, impo inkemaigavakerora ontivotanakenkanira tivorintsi, aikiro osonkatanakenkanira sonkarintsi ontiri aikiro ontamporatana-kenkanira tampora, oniakaganakenkanira arepa irorori ompoimaenkanakera magatiro, maganirosanotyo irompatakaventaiganakempara povetsikakagantakerira. ¹¹Pikantake aikiro tyanirika garira yompatakaventari intagakenkanyo oronoku.

¹²Maikari maika nokogake nonkantaigakempara yogaegi jorioegi pipegakaigakarira pinampinaegi kameti ineageigakempirira maganiro timageigatsirira aka pigipatsiteku tera inkematsaigempi, aikiro teratyo impinkatsatumaigempi, nerotyo tera tatoita irovetsiku- maige irogishineagakerira pitasorintsiegi, aikiro tera irompatakaventaigempari povetsikakagantakerira yovetsikantunkanirira kori. Iriroegitari nokantakerira maika yogaegi Sarerako, Mesako intiri aikiro Averenego.

¹³Impo irirori ikisamatanakatyo kara ikantake iramaigakenkanira. Antari yamaigunkanira ¹⁴ikantaigiri:

—¿Arisano tera tatoita povetsiku- maige viroegi pogishineagakerira

notasorintsiegite, aikiro tera pompata-kaventaigempari novetsikagantakerira yovetsikantunkanirira kori?

¹⁵Maikari maika nokogake nonkantaigakempira. Omataenkani aikiro ontivotenkani tivorintsi, aikiro osonka-taenkani sonkarintsi ontiri aikiro ontamporataenkani tamera, oniaka-gaenkani arepa irorori. Antari pinkemai-gavakerora ompoimaenkatanakera pompatakaventaiganakemparirika kametitake. Antari garika pompataka-ventaigari nogenaneyaty nontagaka-gantaigakempi oronoku. Mamerityo tasorintsi gaveankitsinerira impugamentaigakempira.

¹⁶Kantankicha iriroegi ikantaigirityo:
—Garaty tyara nokantumaigi.

¹⁷Yogari Tasorintsisanorira nokematsaigirira naroege iragaveaketyo impugamentaigakenara ganiri otagaigana tsitsi, aikiro viro gara tyara pikantumaigana.

¹⁸Maika nokogaigake pogotakera garika ikogi impugamentaigakenara nonkamai-gaketyo, kantankicha garaty tatoita novetsikumaigi nogishineagakerira pitasorintsiegite, aikiro garaty nompatakaventaigari povetsikagantakerira.

¹⁹Irorori ogaty okenake ikisananotana ikisavorotanakaty kara ikantake ontagakenkanira tsitsi oronoku pairotyo ogisashitasanotakenkani ovashigavagetakenkanityo kara onkatsirinkatasanotakera. ²⁰Impo ikantaigakeri isoraroegite pairorira ishintiigake irogusoigakerira Sarerako intiri Mesako intiri aikiro Averenege iokavokiigakerira oronoku.

²¹Impo iriroegi yogusoigakeri. Onti yogusotakoigakeri magatiro imanchakipage yogaguigakarira, impo iokavokiigakeri. ²²Ogari orono pairotyo okatsirinkatasanotake, ikisakatari koveenkari yovashigakotakaro yogatsirinkatagantakerora, neroty irore yaiñoniigavetanakara iokavokiigakerira otagaigavakeri

iriroegi, ²³kantankicha yogaegiri Sarerako, Mesako intiri Averenege iparigaigake tsompogi gusoigamataka. ²⁴Yogari koveenkari Navokoronosore ikamagutakoigakeri. Impo yogavageta-naketyo kavako ikavirimatanakatyo ikantakerira inampinaegi:

—Antari iokavokiigunkanira imatsi tera ario irinaige mavani?

Ikantaigiri:

—Jeeje, arioniroro.

²⁵Ikanti irirori:

—Kogapage maika onti noneake 4 tsareakoigaa nuivageigake anta tsitsiku tera tyara inkantumaigempa. Yogari itentaigakarira kañotaka isaankariite tasorintsi.

²⁶Ovashi yaiñonitanaka ovegantakara orono ikaemakoigakerira Sarerako, Mesako intiri Averenege ikantaigiri:

—Viroegi iromperaneegi Tasorintsi visageigiririra maganiro tasorintsi, atsi tainaegi konteiganee.

Iriroegi ikonteiganee. ²⁷Impo yapato-ventaiganakari maganiro itinkamipage timageigatsirira Vavironiaku intiegiri aikiro inampinaegi Navokoronosore ineaigakerira teraty ontagamaigeri tsitsi. Ogari igishiegi osatyotirosanoty kara. Ario okañotaka aikiro imanchakiegi, aikiro teraty intsitsienkatumaige.

²⁸Impo yogari Navokoronosore ikanti:

—Pairo yagaveavageti Tasorintsi ikematsaigirira Sarerako, Mesako intiri Averenege, itigankakeritari isaankariite ipugamentaigakerira iromperaneegi kematsaigiririra irirori, tera naro inkematsaige, onti ipimantaiganakaro igamane ganiri ipegumaigiri pashini itasorintsite, ontityo ariompa impanirotasanoiganakerira Tasorintsi ikematsaigirira iriroegi. ²⁹Maikari maika nonkantake tyanirika samatsanatakerine yoga Tasorintsi ikematsaigirira iriroegi irogiropegakenkanityo, ogari ivanko

omposantevegetakenkani, mameritari pashini Tasorintsi kañotakemparineririra irirori impugamentantakera.

³⁰Impo ovashi ipaigakeri Sarerako, Mesako intiri Averenego pashini irantaneegi pairorira avisakero oketyorira yantaigavetaka okyara.

Impogini ipegaka igoveenkariegite karereoege pashini paitacharira Veresasure, kantankicha impogini yogunkani, impo irirokya pugairi paitacharira Irario. Irirori onti iponiaka Meriaku.

Iokunkanira Iraniere yashitakotara matsontsori

6 ¹Impogini yogari koveenkari Irario yagake 120 irapatoire ipegakagai-gakari inampinaegi ikantaigakeri ineageigakenerira magatiro igipatsiteku. ²Impo aikiro yagake pashini mavani kameti irironiri neasanoigakerine yogaegi 120 ganiri tyani sariimatari irirori. Paniro yoga yomavatakarira inti Iraniere, ³kantankicha irirori paio yavisake yogovagetakera yavisaigana-keri maganiro neageigantankitsirira, aikiro yavisaigakeri piteniro itentashii-gakarira irirori ineigakerira yogaegi 120, nerotyo ikogantanakarira koveenkari Irario iravisakagasanotakerira iravisaigakerira maganiro itinkamiegi-page timageigatsirira igipatsiteku.

⁴Kantankicha ikemaigakera iriroegi ovashi itsitiiganakero ikamagutasanoigakanerira kara ineigakera ariorika irovetsikumatake tatarika oita kameti intsavetantaigakerira inkamantaigakerira Irario iokakagantaigaerira, kantankicha irirori omirinkatyo itsatagasano-vegetakero magatiro irantane, aikiro inegintetasanovagetaka tera tatoita irovetsikumate terira onkametite nerotyo tyampatyto iragaigakero intsave-

tantaigakerira, ⁵ovashi ikantavakagai-gaka:

—Maika tyampatyto ankantaigeri Iraniere, teranika tatoita irovetsikumate kameti antsavetantaigakerira, kantankicha irirori pairotyo ikematsavagetiri itasorintsite kantakanityo iniirira. Maika impatyto ankantaigerira agoveenkariegite inkantavitantakerora ganiri iniimataagani tasorintsipage impa ariorakari ontimake agaigakerira antsavetantaigakerira.

⁶Impo iaigake ikantaigakerira Irario ikantaigi:

—iNogoveenkariegite, nokogaigake pinkusogamanetakera! ⁷⁻⁸Maganiro naroegi notentaigakari maganirosanotyo pipegakagaigakarira itinkamipage notovaireegi timaigatsirira aka Vavironiaku nokemavakagaigakara nonkantaigakempira pinkantavitantakerora ganiri iniimataagani tasorintsipage kigonkero avisanaempara 30 kutagiteri. Ario onkañotake gara tyani niimatiri pashini inevitakerira tatarika oita, panirosanotyo viro iriniaitakempira ineviitakempira. Kantankicha nokogai-gake pintsirinkakerora pogakerora pivairo ganiri okantatigumatagani onti onkañotakemparo ikantaigirira meroegi intiegiri peresaegi. Impo pinkamantan-takero inkemaigakera maganiro pashintaigarira kameti intsatagaigakerora maganiro. Yogari tyanirika garira itsatagiro inkisakenkanityo iokakenkani yashitakotaganira matsontsori gantacharira irogakemparira.

⁹Impo irirori itsirinkakero ikañotagerora ikantaigakeririra, aikiro yogakero ivairo. ¹⁰Kantankicha yogari Iraniere ikemavetakatyo iatai ivankoku, yagatsonkutanai imagira, yashireagetakero ovenakitakara nankitsirira oatakara Jerosaren, itigeroanaka iniakerira Tasorintsi ikantakerira ishineventakari.

Onti iniiri tsitekyamani, ikatinkatanaira poreatsiri ontiri aikiro inanaira shavini, kantakatari irirori yogametakara iniirira omirinka kutagiteri. ¹¹Impo iriroegi kisaigakeririra yapatoitaigaka iaigakera ivankoku ineagapaakeri niaventake ikantakerira Tasorintsi inkavintsaavagetakera. ¹²Iriroegi igenaneyatyo ishigaiganaka ikantaigakerira Irario:

—Nogoveenkarijegite, ¿matsi tera pintsirinke pinkantakera iokakenkanira yashitakotaganira matsontsori gantacharira tyanirika niaerine itasorintsite tekyara avise 30 kutagiteri? Aikiro ¿matsi tera pinkante ario inkañotakenkani tyanirika nevitakerine pashini tatarika oita garira viro ineviti?

Irirori ikanti:

—Arioniroro notsirinkake, aikiro nokantake ontsatagasanotakenkanira onkañotakemparora ikantaigirira meroegi intiegiri peresaegi.

¹³Iriroegi ikantaigiri:

—Yogari Iraniere iyashikitanakerira Jora yamunkanirira pairani itimavetara tera inkematsatempi intsatagakerora pikantakerira. Onti atanatsi iniirira itasorintsite tsitekyamani, ikatinkatatera ontiri inanaira shavini.

¹⁴Antari ikemavakera irirori ikenkisu-reavagetanakatyo kara impo ikoganake-tyo irogavisaakotaerira Iraniere. Ipiriniventakerotyoka kara niganki ishonkanaka poreatsiri. ¹⁵Impo iriroegi ipigashiigaari aikiro ikantaigakerira:

—Nogoveenkarijegite, viro pogotaketari gara pagaveimati pikantatigirora pikantakerira, ariotari ikantaigiri meroegi intiegiri peresaegi gara agaveimatagani onkantatigakenkanira ikantirira koveenkari itsirinkakerira.

¹⁶Ovashi itigankake yagakitaganira Iraniere yogiagunkanira yashitakotaganira matsontsori, kantankicha irirori ikantavakeri:

—Ariorika impugamentakempi pitasorintsite pikantakanirira pikematsatirira.

¹⁷Impo amunkani omarane mapu itikakotantunkanira. Yogari Irario yontsirekakotakero yogakerora iseyone. Imatakero aikiro irashiegi inampinaegi ganiri tyani shireakotumatiri Iraniere inoshikaerira inkantatigakerora ikantakerira. ¹⁸Impo iatai ivankoku ikenkisureavagetanakatyoka kara tera isekataempa, aikiro teratyoka inkoge isonkatimotakenkanira ontika iatake inoriakara, kantankicha teratyoka irimage yagavagetioka kutagite. ¹⁹Impo okutagitetanaira itinaanaka tsitekyamanisano itsatimavagetanake iatakera yashitakotara matsontsori ²⁰ikaemakotapaakeri Iraniere kenkisu-reaenkamatakatyoka kara ikantiri:

—Ogaa Iraniere, ¿aiñovi? ¿Yogari Tasorintsi kantakanirira itimi pikantakanirira pikematsatirira viro ipugamentakempi tera irogaigempi matsontsori?

²¹Inianake Iraniere ikantiri:

—iNogoveenkarite, nokogake pinkusogamanetakera! ²²Jeeje arisanoniroro ipugamentakena. Irirori itigankakeri isaankariite impugamentakenara ovashi yavimakaiganaka matsontsori tera irogaigena, ineakenatari Tasorintsi tera tatoita novetsikumate kameti iokaitakenara aka. Ariotari okañotakari aikiro tera tatoita novetsikumate kameti pinkisakagantakenara viro.

²³Irorotyoka ikemakerira inianakera ogatyoka ikenake ishinevavagetanakatyoka kara ovashi inoshikakagantairi isatyonirosano tera tyara inkantumatemala. Onti okañotaka maika arisanotari opaitaka ikematsatasanotakerira Tasorintsi paniro yogiakotakari irirori, yogotaketari iragaveake impugamentakerira.

²⁴Impo yogari koveenkari yagakagantakeri yogaegi tsavetantaigakeririra Iraniere iokakagantaigakerira yashitako-

tara matsontsori. Maganirosanotyo iokakagantaigakeri imaigakerityo itomiegi iriroegi ontiegiri itsinanetsie-gite. Antari iokaigunkanira tekyakenka-tyo imparigumaige savi itimashiigava-kerityo matsontsori yagaigavakerira yogaigavakarira.

²⁵Impogini yogari koveenkari itsirinkaigakeneri maganiro yashintaigara itsotenkasanoigakerityo ikantaigakerira ikanti: “Pintimagantsivageigakera kameti. ²⁶Maika nokogake nonkantaigakempira maganiro viroegi nashintaigara nokogake pimpinkasanoigakerira Tasorintsi ikematsatirira Iraniere pishigekavageiganakera, intitari Tasorintsisanorira kantakanirira itimi gara ineimatiro igamane. Inkantakani-tyo imegakempa igoveenkariegite maganiro matsigenkaegi garatyo tyani

gaveimatatsi impugatakemparira.

²⁷Irirori yogavisaakotanti, aikiro ipugamentanti. Ontiri aikiro yovetsika-gemati posantepage terira oneimagetenkani anta enoku ontiri aikiro aka kipatsiku. Irirotari pugamentakeri Iraniere nerotyo tera irogaigempari matsontsori.”

²⁸Impo ovashi ariompa ishineventava-getanakariri Iraniere kigonkero ipegakara Suro igoveenkariegite Peresuakunirira. Impo ario ikañotaka irirori aikiro ishineventavagetakarira.

Impogini yogari Tasorintsi yogotageri Iraniere posantepage tyarika onkantanakempa impogini. Irirori itsirinkakogetakero sankevantiku Iraniere capítulos 7—12. Aikiro omirinkatyo iniaventaigakeri itovaireegi.